



册府元龟
卷之三十
至二



1 3
849
13



門 4 3
849
13



册府元龜

淮南李嗣京參閱

西極文翔鳳訂正

豫章黃國琦較釋

帝王部 三十

六十四奉先第三

唐高祖以隋恭帝義寧元年封唐王二年三月巳巳

立四親廟武德元年五月甲子即位六月巳卯追尊

皇高祖瀛州府君曰宣簡公皇曾祖司空曰懿王皇

祖景王曰景皇帝廟曰太祖陵曰永康皇祖妣曰景

烈皇后皇考元王曰元帝廟曰世祖陵曰興陵皇妣

曰元真皇后

臣欽若等按唐史晉恭帝義寧元年十月二月追贈高祖太祖唐襄公為景王考

唐仁公為元王二年三月竝高祖立四親至是追尊為元帝以上事見帝系門迎神王祔于

太廟

六年四月己未幸故宅改名通義宮祭元皇帝於舊

寢以貞元皇后配享高祖哽咽悲不自勝侍衛莫不

獻欷

太宗貞觀三年正月戊午有事於太廟

九年五月上太上皇謚曰太武皇帝廟號高祖陵曰

獻陵

七月甲寅增修太廟崇祔弘農府君及高祖神主并

舊四室為六室

臣欽若等按弘農府君太宗之六代祖名重耳仕後魏為弘農太守是歲

太守命有司詳議廟制八座等奏議依晉宋故事立親廟六從之

十二月庚戌詔曰昔周監二代崇文武之典禮漢紹

三王尊高光之功烈斯固有國之彝訓不刊之令範

高祖太武皇帝聰明神武獻聖徇齊應天順民撥亂

反正德侔造化道濟區夏靖率土之沸騰拯黔首之

塗炭一戎大定四海宅心制治定之禮作功成之樂

天地交泰品物咸寧聲教遐洎休徵雜沓蠻夷戎狄

之長輻湊蒙街麟鳳龜龍之祥光映圖史然猶日慎

一日推而弗居邁遠古之鴻名踰前王之至治朕以寡昧丕承景業緬惟永往攀慕終天思弘尊親之道庶展罔極之志竊惟太原之地肇基王迹事均豐沛義等竊燕理宜別建寢廟以彰聖德詳觀漢典抑有成規但先皇遺旨務存儉約虔奉訓誡無忘啓處宜令禮官與公卿等詳議以聞

十三年正月乙巳朔謁獻陵先日宿衛黃麾仗周衛陵寢至是質明七廟子孫及諸侯百僚蕃夷君長皆陪列于司馬門內帝至小次降輿號哭入闕門西面再拜慟絕不能興禮畢改服入于寢躬親執饌啜高祖及先后服御之物匍匐床前悲慟左右侍御者莫不獻欬

十六年四月辛亥制每薦新於太廟令太嘗卿及少卿一人行事十二月令左監門中郎將齊士員將兵衛獻陵乙酉帝召士員至望見而降殿自迎悲咽不已謂從官曰頃籒歲陰道暮情深罔極所備新衣珍饌欲以正旦奉薦園陵朕若親行便勞曷從三元告始家有吉凶慶慰之禮咸重茲日朕不欲煩勞乃自抑止因命江夏王道宗代行所獻之物竝跪授道宗焉

十七年四月十一日帝親謁太廟謝承乾之過

高宗以貞觀二十三年六月卽位上文皇帝尊謚廟號太宗陵曰昭陵八月庚子奉太宗神主祔于太廟永徽元年五月吐火羅國獻大鳥高七尺帝以太宗懷遠所致獻于昭陵仍刻像於陵之內

三年正月丙子親祠太廟及布幣裸獻至太宗仰視六年正月壬申朔親謁昭陵文武百寮及宗室子孫竝陪位帝降輦易服行哭就位再拜擗踊禮畢又改服奉謁寢宮其崇聖宮妃嬪大長公主已下及越趙二國太妃等先於神座右侍列如平生帝入寢哭

踊絕於地進至東階西面再拜號慟久之乃進太牢之饌如珍饈具品引太尉無忌司空勣越王福曹王明左屯衛大將軍程知節竝入執爵進俎帝至神座前拜哭奠饌闋先帝先后衣服拜辭訖行哭出寢北門乃御小輦還行宮五月辛未以高祖太武皇帝旣開基業不可限以常禮忌日特宜廢務

顯慶元年十月幸鄭州次汜水以先帝於汜水擒竇建德因平王克於是刻石立頌以紀功烈帝自爲頌文

五年二月乙未帝以每年二月太嘗卿少卿分行二

陵事重人輕又不備鹵簿威儀有闕乃令三公行事
太嘗卿少卿爲副太嘗別造鹵簿事訖則納於本司
仍著於令

龍朔二年六月辛酉詔奉嘗寺每五月六月停教樂
以太宗文皇帝文德皇太后忌月故也

乾封元年六月戊午詔曰朕以寡德嗣守宗祧雖明
發載懷肅恭禋祀踐霜露而興感奉盥洗以增哀每
惟宗廟至敬虔誠裸享而二尊一奠情有未安思革
舊章用崇嚴配管子曰禮者因人之情緣禮而爲之
節也故三王五帝禮制不同損益隨時期於適便况

罔極之恩旣展于茲辰終身之慕情深於是日豈可
以因循經禮乖違誠敬自今已後宗廟薦享爵及簠
簋登鉶各宜別奠其餘牢饌並依嘗典

咸亨四年令劉仁軌郝處俊修撰國史帝以許敬宗
所紀多不實處俊曰先聖仁恩觸類皆是臣處俊往
年宿衛之日被差腰輦供奉見有三衛誤拂御衣此
人怕懼五情無主先聖謂之曰此間無御史我不爲
汝作罪過不須怕懼帝謂處俊曰此亦須入史

五年八月壬辰追尊太祖武皇帝爲高祖神堯皇帝
太宗文皇帝爲太宗文武聖皇帝太穆皇后爲太穆

神皇后文德皇后為文德聖皇后皇帝稱天皇皇后稱天后以避先帝先后之稱

儀鳳二年五月壬戌詔尊宣皇帝陵為建昌陵先皇

帝陵為延陵臣欽若等曰宣皇帝即高宗六代祖也武德初進謚宣簡公先皇帝五代祖也

武德初尊謚懿王至是俱尊為帝

中宗以弘道元年十二月即位上天皇太帝尊謚廟

號高宗葬乾陵

神龍元年正月復位改享德廟依舊為京太廟臣欽若等

曰初武后革命改京太廟為享德廟至是復焉五月壬午遷武氏七廟于

西京崇尊廟崇尊武氏太廟東都創置太廟

八月乙亥崇祔太祖景皇帝獻祖先皇帝代祖元皇

帝高祖神堯皇帝太宗文武聖皇帝皇考高宗天皇

大帝皇兄義宗孝敬皇帝於東都太廟禮畢即日還

宮

十二月上則天皇后謚曰則天大聖后

睿宗唐隆元年六月即位七月庚辰追尊則天大聖

皇后依舊為天后

景雲元年十月復追尊天后為大聖天后

十一月巳酉葬中宗孝和皇帝於定陵帝思中宗之

德乃為紀聖頌以揚其徽範命有司刻之於石初中

宗以皇兄義宗孝敬皇帝祔太廟第七室至是中書令姚元之等奏於東都別立義宗廟祔中宗孝和皇帝和思皇后趙氏神主于太廟

太極元年正月辛未朔有事於太廟

延和元年六月乙卯追尊大聖天后為聖帝天后

玄宗先天元年八月即位十月丁酉太上皇詔曰昔重華嗣德格于文祖高密陟后至于神宗蓋所以敬履端之元申孝享之道皇帝初嗣大寶允膺休命歡洽人靈慶溢宗社安躬祇祀典用展肅雍可以今月四日謁享太廟所司准式庚子帝謁太廟壬寅祔昭

成皇后肅明皇后神主于儀坤廟

臣欽若等按唐書昭成皇后竇氏女

宗所生母也陵曰靖陵肅明皇后劉氏玄宗嫡母也陵曰惠陵

開元二年四月辛未詔曰園陵之地衣冠所遊凡厥有司罔不祇事禮存則先王是訓禮失則后代何觀欽若永圖敢忘舊典頃者別致鷹狗供奉山陵至於料度極多費損况昔誠禽荒既非尋嘗所用遠惟龍馭每以仁愛為心彼耕象與耘鳥且增哀慕豈飛蒼而走黃更備畋獵有乖儀式無益崇嚴載懷虧紊良深悚惕諸陵所有供奉鷹狗等竝宜即停

四年七月己亥上太上皇尊謚曰大聖貞皇帝廟號

睿宗葬橋陵八月壬子勅宜於太廟西街西少府監

空園內別造中宗廟依前隸入太廟署

臣欽若等按唐志禮官議

日孝和皇帝有中興之功而無後嗣請因殷之陽甲漢之成帝出為別廟從之

肅明皇后神

主於儀坤廟安置

臣欽若等按唐志禮官議曰昭成皇后有大祧之德已配於睿宗肅

明皇后無啓母之尊自應別廟從之

乙巳勅中宗孝和皇帝合別立廟

宜修理儀坤廟隸入太廟署不煩別署官屬

十一月丁亥徙中宗神主于西廟

五年正月癸卯太廟四室壞帝素服避正殿迎神主

於太極殿輟朝五日視事於別殿己酉親享太極殿

十月丙子京師修太廟成戊寅祔神主于太廟

六年十一月辛卯至自東都丙申親謁太廟時有司

撰儀注以祔祭之日車駕發宮中帝謂宰臣宋璟蘇

頊曰祭必先齊必也據儀注祭之日發大明宮又以

質明行事朕便侵星而發猶是移辰方到質明之禮

其可及乎又朕不宿齋宮即安正殿情所不敢寗於

廟所設齋宮五日赴行宮宿齋六日質明行事庶合

於禮璟等稱聖情深至請即奉行詔有司改定儀其

日帝自齋宮步詣太廟入自東門就位樂奏九成

升自阼階行祿奠之禮至睿宗室俯伏嗚咽侍臣莫

不流涕乃下制曰朕聞禮莫大於孝惟孝所以通神

以匠者功就饗人禮奉雖是効是則率繇典章而不躬不親曷盡誠敬粵自河雒旋于京師聿修齋祭致用蠲潔屬羣方駿奔庶位咸列裸奠式受咸懷載殷聖靈在天若享精意伊爾王公卿士下逮黎蒸道存念茲惠乃錫類

七年五月勅曰五月是齋舊有嘗式六月緣忌特令斷屠宜令所司進蔬食府縣捉搦勿令屠宰

十年六月己巳增置京師太廟爲九室移孝和皇帝

神主以就正廟下詔曰朕聞王者乘時以設教因事以制禮沿革以從宜爲本取捨以適會爲先故損益之道有殊質文之相甚異且夫至德之謂孝所以通於神明大事之謂祭所以虔于宗廟國家握紀命曆重光累盛四方繇其繼明七代可以觀德朕嗣守丕業祇奉睿圖聿懷昭事罔不恤祀嘗覽古典爰詢廟制遠則殷周事異近則漢晉道殊雖禮文之不一固嚴敬之無二朕以爲立愛自親始教人睦立敬自長始教人順是知政以道存禮從時變特因宜以創制豈法古而限今况恩以降殺而疎廟以遷毀而廢雖

式瞻古訓禮則不違而永言孝思情所未足享嘗則止豈愛崇而禮備有禱而祭非德盛而流永其祧室宜列爲正室將使親而不盡遠而不祧廟以貌在宗由尊立俾四時式薦不間於毀主百代靡遷匪惟於始廟所謂變以合禮動而得中嚴配之典克崇肅雍之美茲在又兄弟繼及古有明文今中宗神主猶居別處詳求故實當守不安移就正廟用彰大典仍創置九室宜令所司擇日啓告移造

十一年正月行幸北都帝親製起義堂頌刻石紀功于太原府之南街五月乙丑遷祔中宗神主于太廟

一作四月丙辰

制曰崇建宗廟禮之大者聿追孝饗德莫至

焉今宗以立尊親無遷序永惟嚴配致用蠲潔棟宇式崇禋奠斯受顧茲薄德獲承禋祀不躬不親曷展誠敬宜用八月十九日祇見九室

是月戊申尊八代祖宣皇帝號懿祖始祔于太廟之九室

十七年十一月庚寅親享九廟辛卯發京師丙申謁橋陵帝望陵涕泣哀感左右奉先縣以所管萬三百戶供奉陵寢曲赦縣內大辟罪已下戊戌謁定陵己亥謁獻陵乙巳謁乾陵戊申還宮

二十一年正月乙巳遷肅明皇后神主於太廟祔睿宗室殿儀坤廟

二十五年七月己卯詔諸陵廟竝隸宗正寺其官員悉以宗子爲之

二十七年二月己巳詔曰宗廟致敬必先於如在神人所依無取於非族深惟至理用切因心其應緣太廟五享於宗子及嗣郡王中揀擇有德望者令攝三公行事其異姓官吏不須令攝

二十八年七月壬寅尊宣皇帝陵爲建初陵先皇帝陵爲啓運陵仍置官員

天寶元年二月甲午親享太廟

以加尊號故也

二年三月制曰涼武昭王朕十一代祖也積德右地炳靈中葉奄有舊國兆先帝功敬追尊爲興聖皇帝其陵側左近仍竝禁樵牧春秋二時備致祭

八月制曰禮祀者所以展誠敬之心薦新者所以申霜露之思是知先王制禮蓋緣情而感時朕承丕業肅恭祀事至於諸節嘗修薦享自流火留期商風改律載深追遠感物增懷且詩著授衣令存休澣在於臣子猶及恩私恭事園陵未標典式自今以後每至九月一日薦衣于陵寢貽範千載庶展孝思且仲夏

端午事無典實傳之淺俗遂乃移風况乎以孝道人
因親設教感游衣於漢紀成獻報於禮文宣示庶寮
令知朕意

六載正月丁亥親祠太廟

以戊子祀
圖丘故也

八載閏六月丙寅上高祖神堯皇帝尊謚曰高祖神
堯大聖皇帝太穆皇后竇氏尊謚曰太穆順聖皇后
太宗文武聖皇帝尊謚曰太宗文武大聖皇帝文德
聖皇后長孫氏尊謚曰文德順聖皇后高宗天皇大
帝尊謚曰高祖天皇大聖皇帝大聖則天皇后武氏
尊謚曰則天順聖皇后中宗孝和皇帝尊謚曰中宗

孝和大聖皇帝和思皇后趙氏尊謚曰和思順聖皇
后睿宗大聖真皇帝尊謚曰睿宗玄真大聖皇帝昭
成皇后竇氏尊謚曰昭成順聖皇后蕭明皇后劉氏
尊謚曰蕭明順聖皇后以來月五日於太清宮聖祖
前恭申冊禮宜令所司卽詳定儀注聞奏丁卯詔曰
禘祫之禮以存序位質文之變蓋取隨時國家系本
仙家業承聖祖重熙累盛旣錫無疆之休合享登神
思弘不易之典自今已後每神竝於太清宮聖神前
設位序正上以明陟配之禮欽若玄穹下以盡虔恭
之誠無違至道比來每緣禘祫時享則停事雖適於

從宜禮或虧於必備已後每緣禘祫其常享無廢又
 奉先追遠禮惟昭德崇福展敬義在因心自今已後
 獻祖宣皇帝宣莊皇后懿祖光皇帝光懿皇后忌日
 宜令京城寺觀一日設齋太祖景皇帝烈皇后代祖
 元皇帝元貞皇后忌日京城三日行道

九載十一月巳丑制曰春秋致享用存昭敬祝史陳
 信必在正辭苟各位之或乖於上下而非便故經稱
 崇事易載顯若所以展祗肅明等威朕欽崇道本嗣
 守丕業每懷如在之誠敢忘奉先之旨禮或未達情
 實匪寧承前有事宗廟皆稱告享茲乃臨下之辭頗

虧尊上之義靜言斯稱殊未為允自今已後每親告
 獻太清宮太微宮改為朝獻有司行事為薦獻親告
 享宗廟為朝享有司行事為薦享親巡陵為朝拜有
 司行事為拜陵應緣諸事告宗廟者改為奏其郊天
 后土及祀祝云敢昭告于者並改為敢昭薦于式崇
 寧禮庶表因心宣示中外令知朕意

十載正月癸巳朝享太廟 以甲午有事於南郊故也

十一載三月丙午制今後每月朔望宜令薦食於太
 廟每室一牙盤乃五日一開室門灑掃

十三載二月癸酉親享太廟以兩漢諸帝廟號皆有

孝字帝王徽號莫大於孝是以上高祖神堯大聖皇
 帝謚曰高祖神堯大聖大光孝皇帝太宗文武大聖
 皇帝曰太宗文武大聖大廣孝皇帝高宗天皇大聖
 皇帝曰高宗天皇大聖大弘孝皇帝中宗大和大聖
 皇帝曰中宗大和大聖大昭孝皇帝睿宗玄真大聖
 皇帝曰睿宗玄真大聖大興孝皇帝
是歲改獻昭乾定橋五陵署為
臺其署令改為臺令加舊一階
 肅宗至德二年十月丁卯入長安先是九廟為賊所
 焚帝素服哭於廟三日入大明宮
 十二月新作九廟神主於長安殿安置帝親告享流

涕嗚咽感動左右初帝在彭原使人於鳳翔郡採栗
 木以作神王備之及是奉迎告享用之

乾元元年四月辛亥九廟神主自長安殿遷入太廟
 帝備法駕鹵簿警蹕王公百寮從甲寅帝親行享禮
 代宗以寶應元年四月卽位上文明武德大聖大宣
 孝皇帝尊謚廟號肅宗陵曰建陵
 五月庚寅進册先妃吳氏為皇太后
 三年四月巳丑祧獻祖懿祖二室遷太祖巳下七室
 祔玄宗二室五月辛亥以醴泉縣奉建陵昇國祿縣
 廣德二年正月丙辰勅以來月七日饗太廟二月甲

成親享太廟九室

大曆二年四月癸未詔有司陵廟祠祭并三長齋月
依舊薦酒肉

七年五月徙忻州七聖廟尊容置于太原之紫極宮
八年五月庚子是日太宗諱日命有司備四千僧齋
於昭成寺十月巳酉命有司大禘於廟是日冬享因
展禮也

德宗以大曆十四年五月卽位八月庚申上睿文孝
武皇帝尊謚廟號代宗葬元陵

十二月巳酉祔代宗神主于太廟禮儀使顏真卿奏

議祧元皇帝于西夾堂

建中元年正月庚午謁太廟

以辛未有事于南郊也

三月丙寅禮儀使奏東都太廟闕木主請造詔下議

之初武后於東都立高祖太宗高宗三廟至中宗已後兩京太廟四時並祭至德之亂木主多亡缺未附於是議者紛然而大旨有三日必存其廟遍立羣主時享之日以他官攝行二日建廟立主存而不祭若皇輿時巡則就享之三日存其廟座或東幸則飾齋車奉京師羣廟之主以往議皆不決而罷

二年二月復肅宗神座于寢宮先是寶應二年西戎
犯京師焚建陵之寢室至是始創復焉

十月癸卯祫饗太廟始奉獻祖神主出行祫禮初寶
應二年玄宗肅宗神主祔廟始遷獻祖懿祖神主於

西夾室是時禮儀使于休烈以國喪畢將行祫享以太祖既位當東面獻祖懿祖屬尊於太祖若同祫享卽太祖不得居正位於是永闕二神主於西夾室至是有司亦以國喪既畢當行祫禮於是大嘗博士陳京建議請准魏晉以來祫禮奉二主出同祫享與太祖竝列昭穆而虛東向之位又云若以二祖同享謂太祖失尊位卽請奉二祖神主於德明皇帝廟祫享詔下尚書省雜議禮儀使顏真卿請依蔡謨等議至祫享之日奉獻祖神主居東面之位自懿祖太祖洎諸祖宗尊左昭右穆之列時宰臣百寮竝同真卿之議奏留中不出將及祫享真卿又奏請從蔡謨議爲定從之

興元元年十二月甲午詔曰朕一經播遷久曠禮儀不唯霜露之感實貽失墜之憂賴先澤在人上帝臨我克平大難載復舊京方欲展禮郊丘請罪宗廟而乃股肱卿士詢謀異同明孝敬之大端陳古今之正義三省章表深體乃誠以義制心允從衆請予之不德愧歎良深其來年告謝郊廟百寮請俟後期者可之其元日御含元殿准式時李懷光李希烈竝叛逆不賓京師將士賞賚未徧人情尚擾不安李晟自鎮

上表請權停郊廟之禮百寮議與晟協故有是詔
貞元五年八月詔天下諸上州並宜國忌日准武行
香

九年六月癸亥詔定國忌日寺觀齋僧道人數有差
十一月甲寅朝享太廟前一日有勅至廟行禮不得
施禱至敬之所自合履地而行

十二年十月辛亥禘祭於太廟
十四年正月詔曰八陵宮寢臣欽若等曰自高祖至代宗凡八陵久要

修葺此緣日月非便未及興宜令宗正寺與所司
卽計料依所擇日速修理初宗正寺奏諸陵宮寢屋

宇摧壞及要科創松栢等勅詔陰陽人楊季炎擇日
起修

三月詔曰八陵舊寢宮在山上置來多年曾經野火
燒焚摧毀畧盡其宮尋移在瑤臺寺側左今屬通年
欲議修置緣供水稍遠百姓非嘗勞弊今欲於見住
行宮處修造冀久遠便人又為改移舊制恐所見未
周宜令中書門下及百寮同商量可否聞奏丁丑令
昭陵宜修舊宮先有五間殿依舊基創造寢殿五間
餘舍屋准圖起造初正月中令有司修葺陵寢以昭
陵舊宮先因火焚毀百官詳議而議者多云修舊宮

帝意欲遷移繇是以山下為定於是遣右諫議大夫
 平章事崔瑱充脩八陵使及所司計料獻昭乾定泰
 五陵各造屋三百七十八間橋陵一百四十間元陵
 三十間唯建陵不復創造但修葺而已所緣陵寢中
 惟牀蓐一事已上竝令創造帝親加閱視然後遣送
 赴陵所八月以修八陵畢廢朝一日羣臣於宣政殿
 前橫行稱賀中尉第五守亮宣詔曰朕獲主宗祀以
 奉園陵歲月滋深是有崇飾今修奉既畢感慕增懷
 所賀知

十五年二月丁亥不視事以公卿等朝拜諸陵循親

視制也

初是月七日葬陵官發其日本不視事是會
 董晉卒廢朝至十六年二月公卿拜陵發
 不視事迄今便因循行
 此禮時謂不經無據也

五月壬戌不視事以通光

帝忌故也

十六年二月辛未不視朝以拜陵公卿辭故也

十九年四月壬辰修德明興聖獻祖廟甲午詔曰奉

遷獻祖懿祖神主太祖景皇帝正東向之位虔告之

禮當在重臣宜令簡較司空平章事杜佑攝太尉告

于太清宮門下侍郎平章事崔瑱太尉告太廟詔曰

國之大事式在於明禋王者孝享莫重於殷祭所以

尊祖而正昭穆也朕承列聖之休德荷上天之眷命

虔奉牲帛二十有五年永惟宗廟之位禘嘗之序夙夜祇慄不敢自專是用延訪公卿稽叅典禮博考群議至於再三敬以令辰奉遷獻祖宣皇帝神主懿祖光皇帝神主祔於明德興聖皇帝廟太祖景皇帝正東向之位宜令有司備禮務極嚴重祇肅祀典載深感惕咨爾中外宜悉朕懷丙申奉遷獻祖懿祖神主祔於明德興聖廟文武三品已上官序位於廟廷宗子諸親咸陪列馬門下侍郎平章事崔瑱攝司徒從金輅至行廟升座畢奠用脯酒稱官跪奏安神退戊戌帝不視事宰臣及百官以祔廟禮畢蹈舞賀于宣

政殿前

憲宗永貞元年九月丁卯上神武孝文皇帝尊謚廟號德宗葬崇陵十一月冊謚德宗母沈氏曰睿貞皇后奉神主祔于代宗之室
元和元年七月上至德大安孝皇帝尊謚廟號順宗葬豐陵以奉先縣神泉鄉櫟陽縣大澤鄉美原縣義林鄉竝隸富平縣以奉豐陵
二年正月庚寅朝享于太廟初次諸室帝皆盡于敬誠至德宗順宗室帝流涕嗚咽若不自勝侍臣及奉冊讀冊官皆相顧感泣

穆宗以元和十五年正月卽位五月上聖神章武孝
 皇帝尊謚廟曰憲宗葬景陵以美原縣龍原鄉櫟陽
 縣萬年鄉竝移隸奉先縣以奉陵寢七月歙州奏當
 州有玄宗皇帝真容在開元寺去城十里今請移於
 廓內龍興寺仍交換寺額制可之

長慶元年正月巳亥朔備法駕親薦獻于太清宮遂
 齋于太廟庚子享太廟至順宗顯宗二室上獻歙流
 涕侍臣從官皆感動禮畢復齋于郊壇行宮

敬宗以長慶四年正月卽位上睿聖文惠孝皇帝尊
 謚廟號穆宗葬光陵勅富平縣宜割豐水鄉華州下

邽縣割翟公鄉同州澄城縣割撫道鄉白水縣割會
 賓鄉以奉陵寢

寶曆元年正月庚戌謁太廟

以辛亥有事于南郊故也

七月辛亥勅奉先一縣獨奉八陵供辦支持實爲繁
 併眷言物力須議優矜宜委京兆府減一半租并雜
 色役等令諸縣均出

文宗以寶應二年十二月卽位上睿武昭愍孝皇帝
 廟號敬宗葬莊陵

太和元年四月禮儀使奏拆脩太廟西夾室遷移神
 五位得大小署令狀擇用四月二十四日吉其日光

出室內先祧遷神主五位入幕殿便起首拆脩至五月五日畢功六日却移神主入室詔依

五月京兆府奏莊陵准穆宗陵例割鄰近縣鄉奉陵供應今高陵縣萬福鄉富陵縣從化鄉雲陽縣善化鄉涇陽縣嘗樂鄉其界竝不隔越伏准穆宗陵例合割前件四鄉屬三原縣添奉陵寢從之

三年十一月癸巳謁太廟

以甲午有事于南郊故也

五年五月戊戌朔辛丑宗正寺奏太廟第四室第六室破漏四月九日已具聞奏訖有司不時興工至今稽滯勅太廟或要脩葺有司合星夜興工以涉稽滯

須有懲責將作監王堪宜罰兩月俸料度支判官罰一月俸料宗正卿李銑奏報稍晚量罰一月俸帝遽命中人令領工徒以禁中即日脩營材木脩葺左補闕韋温上疏極諫疏奏帝甚嘉納繇是追止中人命有司嚴加脩奉甲寅宗正等請脩獻陵乾陵定陵橋陵泰陵建陵元陵崇陵豐陵景陵光陵莊陵惠陵昭陵詔曰所脩陵寢事至嚴重簡計崇飾須得精實宜令度支郎中盧商將作少監韋長同往諸陵子細簡計具合修與不合處聞奏

八年正月丙寅修太廟以太嘗卿庾承宣攝太尉徧

告九室遷神主于便殿

五月甲寅詔曰忌辰修齋雖出近制斟酌損益貴於得中况在不遷之宗允資異數之禮五月六日二十六日兩忌設齋人數宜各加至二千人太穆文德皇后忌日亦宜各加倍數其寺觀仍舊十二月八日忌宜於五所寺觀共設四千人宜令所司准式已巳修太廟畢以吏部尚書令狐楚攝太尉通告神主却復正殿

開成元年七月丙戌監察御史請修太廟祭器初帝言於宰臣曰宗廟之事朕合自行千乘萬騎動資國用每至有事之日被朕冠冕危坐待旦比聞有司發饌不精酒醴酸濁卿當宣諭監察御史俾之臨祭勿有不虔御史崔黯監察受宣遂有此奏

四年三月巳卯帝御紫宸殿宰臣楊嗣復奏曰太廟准禮三年一禘五年一禘今是禘祭時讓皇帝廟亦合禘祭臣案讓帝本封寧王玄宗親兄玄宗既定內難寧王能讓帝位玄宗感之贈以鴻名其復置廟享獻禘祫與九廟同至上元二年杜鴻漸奏停時享而禘祫存今玄宗肅宗神主已歸夾室讓皇帝猶禘祫不闕於禮未安李班曰宗廟事重比者臣不敢輕議

帝王至今禘祫實不當禮嗣後所論至當今請下禮
 官議帝曰俞四月壬戌帝御紫宸殿問宰臣曰皇城
 使上言太廟中有麀走出安有宗廟之中得此野獸
 宰臣請宣示宗正寺使令巡簡帝曰可召宗正卿來
 朕自戒勵之遂召宗正卿李踐方至帝曰宗廟至重
 卿宜恪勤官業勿俾太廟有所壞隳勿拘陰陽不旋
 脩葺漢有昭陽未央尚猶崇飾潔况宗廟乎無長蒿
 萊以藏野獸言訖泫然踐方叩頭請罪久之帝自卽
 位宗廟祀事未嘗不戒勵有司俾其嚴潔詩云祀事
 孔明其此之謂乎

終

冊府元龜

淮南李嗣京叅閱

西極文翔鳳訂正

豫章黃國琦較釋

帝王部

三十一

奉先第四

唐武宗以開成五年正月卽位上元聖昭獻皇帝尊
 謚廟號文宗葬章陵

二月制穆宗妃韋氏追謚宣懿皇太后帝之母也

三月勅復國忌行香以文宗開成三年十月曾廢故

也

會昌元年五月祔宣懿皇太后于太廟六日制曰朕近因載誕之日展承顏之慶皇太后謂朕曰天子之孝莫大於丕承人倫之義莫重於嗣續穆宗睿聖文惠孝皇帝厭代已久星霜屢遷禰宮曠合食之禮惟帝深濡露之感宣懿皇太后長慶之際德冠後宮夙表沙麓之祥實茂河洲之範先朝恩禮之厚中壺莫借况誕我聖君續承昌運已協華於先帝方延祚於八昆恩廣貽謀庶弘博愛爰遵舊典以慰孝思當以懿皇太后祔太廟穆宗睿聖文惠孝皇帝之室率

祀彝訓其敬承之祇奉慈旨載深感咽宜令宣示中外咸使聞知

五年十月中書奏云汜水武牢關是太宗擒王世充竇建德之地關城東峯有二聖塑像在一堂之內伏以山河如舊城壘猶存威靈皆畏于軒臺風雲凝還於豐沛誠宜百代嚴奉萬邦所瞻西漢故事祖宗嘗所行幸皆令郡國立廟今緣定覺寺例合毀拆塋取寺中大殿材木於東峯改造一殿四面兼置宮監伏望號爲昭武廟以昭聖祖武功之盛望委孟懷節度使差幹事判官一人勾當修建然聖像頗已故暗望

令李石于東都棟絕好畫手就加嚴飾初興功日望
令東都差分司郎官一人薦告畢日別差官展敬從
之

六年二月太嘗禮院奏准勅東都太廟諸室神主都
二十六都待修廟畢日具禮迎致于西夾室所遷神
主月日及儀注等宜令所司詳定聞奏者擇用四月
九日告制可

宣宗以會昌六年三月卽位上至道昭肅孝皇帝尊
謚廟號武宗葬端陵

四月東都留守李石奉脩奏太廟畢所司迎奉太微
宮神主祔廟訖東都太廟者本武太后家廟神龍中
中宗反正廢武氏廟主立太祖已下神主祔之安祿
山陷雒陽以廟為馬廐棄其神主而協律郎嚴郢收
而藏之史思明再陷雒陽尋又散失賊平東京留守
盧正已又募得之時廟已焚毀乃寄主於太微宮大
曆十四年留守路嗣恭奏重修太廟以迎神主詔百
官參議紛然不定禮儀使顏真卿堅請歸祚不從會
昌五年留守李石因太微宮正殿圯多請以廢弘敬
寺為太廟神主祔之又下百寮商量皆言准故事無
兩都俱置宗廟之禮唯禮部侍郎陳商議云周之文

武有鎬維二廟今兩都異廟可也然不宜置主于廟
主宜依禮瘞于廟之北墉事下未行而帝卽位因詔
有司迎太微宮寓主祈廢寺之新廟而知禮者非之
懿宗以大申十三年八月卽位上聖武獻文孝皇帝
尊謚廟號宣宗葬真陵

九月追尊母晁氏爲太后謚曰元昭

咸通元年十一月丁未有事于郊廟

十三年十二月制追謚宣宗爲元聖至明成武獻文
睿智章仁神聰懿道大孝皇帝

僖宗以咸通十四年七月卽位上睿文昭聖恭惠孝

皇帝廟號懿宗葬簡陵

乾符元年十一月庚寅有事于郊廟

中和元年四月帝在成都府有司請享太禩已下十

一室詔公卿議其儀太嘗卿崔厚議立行廟以玄宗

幸蜀時道宮玄元殿之前架帷幕爲十一室又無神

主題神主版位

達禮者非之明年乃特造神主以祔行廟

光啟三年二月自興元還京以宮室未備權駐鳳翔

禮院奏皇帝還宮先謁太廟今宗廟焚毀神主失墜

請准禮例修奉制曰朕以涼德祗膺寶圖不能上承

天休下正人紀兵革競興於寓縣車輿再越於藩垣

宗廟震驚蒸嘗廢缺敬承典禮倍切哀摧宜付所司
時奉脩太廟使宰臣鄭延昌奏京城除充大內及正
衙外別無殿宇伏聞先有詔旨欲以少府監大廳權
充從之

昭宗以文德元年三月卽位上惠聖恭定孝皇帝尊
謚廟號僖宗葬定陵

四月庚午追謚聖母惠安太后王氏曰恭獻
十一月甲寅有事於郊廟

哀帝以天祐元年八月卽位上聖穆景文孝皇帝尊
謚廟號昭宗葬和陵

二年二月己未昭宗皇帝神主祔太廟禮院奏昭宗
廟樂曰咸寧之舞時左僕射裴贄等議遷廟合遷順
宗一室從之

四月勅河南府緱氏縣令宜兼充和陵臺令仍升爲
赤縣

十月丁未改題襄宗神主廟號是日輟朝百官奉慰
臣欽若等曰時起居郎蘇楷駁昭宗謚號太嘗
卿張廷範改謚曰莊靈恭閱孝皇帝廟號襄宗

後唐莊宗同光元年四月卽位閏月追尊曾祖蔚州
太保爲昭烈皇帝廟號懿祖夫人崔氏曰昭烈皇后
陵曰永興追尊皇祖代州太保爲文皇帝夫人秦氏

日文景皇后陵曰長寧追尊皇考河東軍節度使守太師中書令晉王爲武皇帝詔於晉陽創中興宗廟以高祖神堯皇帝太宗文皇帝懿宗昭聖皇帝昭宗聖穆皇帝洎懿祖已下三室爲七廟

十一月甲辰勅雒京太廟先爲朱溫毀廢將幸維陽宮告廟下尚書省會議重修本朝宗廟

二年正月丁巳所司奏懿祖昭烈皇帝八月十四日忌昭烈皇后十一月八日忌獻祖文皇帝十月十三日忌文景皇后九月六日忌太祖武皇帝正月二十日忌勅敬依典禮甲子西都留守張筠奏重修高祖

太宗十聖宮殿戊辰饗太廟以皇子繼岌爲亞獻皇帝弟存紀爲終獻

二月丁亥遣宗正李紱朝拜和陵丁酉吏部奏十道圖內州縣名共三十七處犯獻祖廟諱勅改易之

三月中書門下奏北京三陵所宜尊奉竊尋故事宜建嘉名昭烈皇帝陵請以永興爲名文皇帝陵請以長寧爲名武皇帝陵請以建極爲名從之

八月以宗正少卿李瓊在曹州檢行哀帝陵寢三年正月丙申勅曰朕顧惟寡德獲嗣丕圖奉先之道嘗勤送往之誠靡怠爰自重興廟社載展郊禋旋蕩滌

于瑕疵復涵濡于慶澤蓋憂勞靜國曠墜承祧御朽
若驚涉川為懼繇是推移歲月鬱滯情懷恭念昭宗
晏駕之辰少帝登遐之日戚罹虺毒遠殞龍髯委冠
劔于仇讎託山陵于梟獍靜惟規制豈叶度程存愴
結以彌深固寢興而增惕虔思改卜式慰允懷宜令
所司別選園陵備禮遷葬貴雪幽明之故以申追慕
之心凡百臣寮體朕哀感雖有是命以年饑財不足
而止巳亥太嘗禮院奏三月合差官朝拜諸陵宜以
十八日辛巳從之癸亥湖南馬殷奏管內州縣名有
犯獻祖廟諱處道州延昌縣復舊名延唐縣彬州義

昌縣改為義章縣岳州昌江縣改為平江縣所司備
換新印賜之

三月丙申寒食節車駕在鄴都帝與皇后出近郊遙
享代州親廟

十月上皇太后諡曰貞簡皇太后名陵曰坤陵

十一月庚寅朔幸壽安號慟於坤陵

明宗天成元年四月卽位七月上莊宗尊諡曰光聖
神閔孝皇帝

八月甲午廢朝以莊宗神主祔太廟禮也

十一月庚寅宗正少卿李堯奏恭陵所共山園之內

被民戶起舍屋居止臺觀皆被侵耕柏城松逕樵採
殆盡乞下本縣與寺司重定完本園林地畝從之

二年二月庚戌勅河南府新安縣宜升為次赤以雍
陵在焉

十二月丙午追尊四代祖麟州僕射諱聿諡曰孝恭

皇帝廟號惠祖衛國夫人博陵崔氏諡曰孝恭昭皇

后三代祖朔州司空諱敖諡曰孝質皇帝廟號毅祖

趙國夫人張氏諡曰孝質順皇后皇祖蔚州司徒琰

諡曰孝靖皇帝廟號烈祖皇祖妣秦國夫人何氏諡

曰孝靖穆皇后皇考汾州太師諱霓諡曰孝成皇帝

廟號德祖皇妣宋國夫人劉氏諡曰孝成懿皇后以

應州舊宅為廟先是中書門下又奏伏以兩漢以諸

稱皇載於諸王故事孝德皇孝仁皇孝元皇是也伏
乞聖慈俯從人願許取皇而薦號兼上諡以尊名改
置園陵仍增兵衛遂詔太常禮院定其儀制太常博
士王丕等引漢桓帝入嗣尊其祖河間孝王曰孝穆
皇帝蠡吾侯曰孝宗皇帝為例請付太常卿定諡刑
部侍郎權判太常卿馬縞復議曰伏准兩漢故事以
諸侯王宗室入承帝統亦必追尊父祖修樹園陵西
漢宣帝東漢光武孝享之道故事具存自安帝入嗣
遂有皇太后令別崇諡法追曰某皇所謂孝德孝穆
之類是也前代惟係皓自烏程侯繼嗣追父和為文
皇帝事出非嘗不堪垂訓今據禮院狀漢安帝已下
若據本紀又不見有帝字伏以諡法德象天地曰帝
伏緣禮院以曾奏聞准將兩漢故事便述尊名請詔
百官集議時右僕射李琪議曰伏覩歷代已來宗廟
成制繼襲無異公葦或殊馬縞所奏禮有案據乞下
制命令馬縞虔依典冊以述尊名時明宗意欲兼加

帝字乃下詔曰朕聞開國承家得以制禮作樂故三皇不相襲五帝不相沿隨代創規于理無爽矧或情關祖禰事係蒸嘗且追諡追尊稱皇與帝既有減增之字合陳褒貶之辭大約二名俱為尊稱若三皇之代故不可加帝五帝之代亦不可言皇爰自秦朝使兼其號至若玄元皇帝事隔千祀宗追一原猶顯册于鴻名豈須尊於漢典况朕居九五之位為億兆之尊不可總二名于躬躬惜一字于先代苟隨執議何表孝誠可委宰臣與百官詳定集兩班于中書逐班各陳所見准李琪等請于祖禰二室先加帝宰臣合眾議奏曰恭以朝廷之重宗廟為先事係承祧義符致美且聖朝追尊之日即引漢氏舊儀在漢氏封崇之時復依何代故事理關疑滯未曰聖謨道合變通方為民則且王者功成治定制禮作樂正朔服色尚有改更尊祖奉先何妨沿革若應州必立別廟即地遠上都今據開元中追尊臯陶為德明皇帝涼武昭皇為興聖皇帝皆立廟於京都臣等商議所議追尊四聖望依御札竝加皇帝之號兼請于各京立廟勅宣依應州舊宅立廟餘依所奏

三年八月祠部舉新廟諱有與人姓同者請改之勅凡有姓犯廟諱者以本望為姓

閏八月辛亥勅准兵部郎中蕭愿奏大忌齋僧道各一百人列聖忌辰齋僧道五十人

十月戊申帝服袞冕御崇元殿臨軒命禮部尚書韓彥輝工部侍郎任贊往應州奉册四廟陵樂奏仗衛如式

四年正月太嘗奏應州四廟陵號惠祖曰遂陵毅祖曰衍陵烈祖曰奕陵德祖曰慶陵忌日行香如太廟諸室

八月戊申帝服袞御文明殿追冊昭宣光烈孝皇帝禮畢使兵部尚書盧質押冊出應天門登車鹵簿鼓吹前道入都亭驛翌日登赴曹州甲子曹州祔饗昭宣光烈孝皇帝禮畢文武百官詣西上閣門進名奉慰

十月癸酉勅昭宣光烈孝皇帝會居寶位久抱幽寃近始追崇方安寢廟宜昇縣邑以奉園陵宜升曹州濟陰縣爲次赤以本縣令兼陵令
長興二年四月禘饗于太廟

三年七月宗正寺奏今年經大雨太廟正殿疎漏門樓墊陷宮墻及神門外仗舍竝皆缺漏請下所司修補司天以墓年不宜興造請隨缺壞處量事增修從之

閔帝應順元年二月山陵使上言太行山陵四月二十七日掩玄宮以御札皇帝親奉靈駕至園陵有司量事供備臣等伏見累朝故事人君無親送葬之儀蓋承繼事大非薄於送終累奏不從
末帝清泰元年四月卽位上明宗尊諡曰聖德和武欽孝皇帝

十一月戊戌中書門下奏太嘗撰定冬至朝會儀詔

日初成園陵彌軫孝思遠履節辰尤增顧復所奏各
伏宜停是月中書門下奏二十六日明宗忌群臣奉
慰行香固有嘗禮恭以陛下初遇忌辰合存降殺仰
惟追感難抑孝思固于茲時不同嘗歲臣等商量請
于忌辰前後各一日不坐從之

二年正月戊申宗正寺言北京永興長寧建極三陵
應州遂行奕三陵曹州溫陵例下本州府長官朝拜
雍坤和徽四陵朝廷從之乙丑遣太嘗少卿蕭愿宗
正卿李郁朝拜徽陵右庶子韋華雍陵宗正少卿李
知新殿中丞李延昭和陵太子中允劉賀太子中舍

李均坤陵

二月己丑宰臣盧文紀等上章曰臣聞聖列九皇必
稟嚴慈之訓貴爲萬乘彌懷顧復之思所謂生我劬
勞昊天罔極故漢昭帝承祧御曆奉尊謚于雲陽魏
文帝繼體守文思外家于甄館則追崇母后祔享廟
庭愛親之道克隆敬本之文斯洽臣等嘗覽國史見
玄宗大聖孝明皇帝母昭成皇太后竇氏作嬪初奉
于相王歷位纔終于藩孺及至上皇傳國聖子臨朝
則追尊配享于闕宮儷極攸先于冢后臣又見代宗
睿文孝武皇帝母章敬太后吳氏入宮纔侍于忠王

短世難登于命婦及寶祚爰歸于聖嗣追尊將祔于陵園則群臣歷懇于封函嚴配請崇于徽號舊章斯在闕禮未伸臣等叨備鼎司合伸茂典伏惟聖母魯國太夫人夢梓興周望雲佐漢亶河洲之懿範契沙麓之休祥三母俱賢周武最承于天統四妃有子唐侯光啓于帝圖仰惟當宁之懷彌軫寒泉之思伏望配陵祔廟法地則天君親實殺于義方恩禮宜歸于聖善母以子貴乃春秋之格言孝以尊親固禮經之明義久虛時薦慮損皇猷俾秦官載顯于玉符魏寢永光于金冊則華夷大願臣子遑寧臣等謹案諡法

聖善周聞曰宣施而不私曰宣博聞多能曰憲聖善周達曰憲謹上尊諡曰宣憲皇太后請依昭成章敬二太后故事擇日備禮冊命故事禮合配陵祔廟臣等再詳儀注備有典彝伏恐朝廷且務于便安司局貴期于辦集酌于故事更司簡詳臣等伏聞先太后舊陵未祔于先朝則都下難崇于別廟旣追尊諡合創闕宮臣等謹案漢故事園寢不在王畿者或在陵所便立寢祠禮文雖異于國朝事理可循于權道臣等商量太后上尊諡後權立祠廟以伸告獻配祔之禮請俟他年詔曰朕猥將眇質獲嗣丕圖暑往寒來

知昊天之用極憂深思遠唯觸地以無容卿等學究源流文苞體要以致財成之美復陳孝理之規援引古今補陳茂實導朕以愛親之禮勉朕以追遠之文取則昭成明徵章敬仍加美謚益見忠誠至於權立闕宮頗亦叶於時變劬勞莫報長懸陟屺之心聖善斯崇且慰循陔之念謹依典禮哀慕增深

六月乙丑太嘗卿李懌定宣憲太后陵號請以順爲名

三年五月太常奏于河南府東權立宣憲皇后寢宮從之

六月御敷政殿遣工部尚書崔居儉奉宣憲皇太后寶冊于寢宮時陵園在河東適會兵興故權于京城修奉寢宮上謚焉

九月戊申帝親行太原太嘗博士段颺白宰臣曰帝未嘗謁陵今河陽路當徽陵前安得經繇不行禮乎是日午時至陵園于仗舍前陳謁陵禮

晉高祖天福二年正月壬戌中書奏皇帝到京未立宗廟者夫以受命握圖既啓無疆之祚宗文祖武宜遵有國之規伏惟皇帝陛下曆數在躬艱難創業拯黔黎之塗炭廓宇宙之氛霾寰區既定于一戎基構

方開於萬祀恭惟宇廟須切追崇將示肅恭豈宜稽
緩臣等商量望令所司速具制度典禮以聞尊始敬
先既光于太后徽章茂典永顯于洪猷從之

五月太嘗卿梁文矩奏奉勅旨定四廟諡號廟號陵
號者伏以四代祖朔州使君府君自天所祐應時而
生肇啓靈源始基鴻業謹案諡法寬容平和曰安臨
事屢斷撫俗多方有明達之能無屈撓之事豈不謂
之寬容平和乎又靖者柔德教衆之義也又義者行
義不失者也請備神主追尊諡曰孝安皇帝廟號靖
祖陵號義陵三代祖右省嘗侍府君動靜有嘗夙夜

匪懈憂人若已視民如傷謹案諡法一德不懈曰簡
富且不驕貴而好禮有典有則無怠無荒豈不謂一
德不懈乎又肅者剛德克就之義惠者寬裕不苛者
也請備神主追尊諡曰孝簡皇帝廟號肅祖陵號惠
陵皇祖振武僕射府君淳德不雜素風自高得安邊
靜塞之機有阜俗濟民之術謹案諡法執事有制曰
平積善積德允武允文動不爲身行唯濟物豈不謂
執事有制乎又翼者思慮深遠之義又康者安樂撫
民者也請備神主追尊諡曰孝平皇帝廟號翼祖陵
號康陵皇考涪州太傅府君天資睿德神贊沈機臨

戎則有敵必摧撫恤則無民不悅謹案諡法主善行德曰元盡善盡美乃神乃聖功煥龍圖慶流鳳辰豈不謂主善行德乎又憲者博聞多能之義昭者明德有功者也請備神主追尊諡曰孝元皇帝廟號憲祖陵號昭陵勅所翼祖宜改爲睿祖昭陵改爲昌陵餘竝敬依又太嘗少卿裴坦奏奉勅定四廟皇后追尊諡議者伏惟四代祖妣秦氏積行芝蘭含貞闈壺徽猷令問厥彰內則之賢懿靜柔明綽有禮闈之節諒非餘慶何啓昌期謹案諡法宣慈惠和曰元請追尊諡曰孝安元皇后伏惟二代祖妣安定太君安氏

門稱盛族代謂良家修德行而義冠稽天蘊柔明而風昭齊體若非淑惠寧協休徵謹案諡法曰貴賢尚義曰恭請追尊諡曰孝簡恭皇后伏惟皇祖妣高平縣太君米氏令惠生知賢才天稟四德早聞於親戚一齊仍著于閨庭淑問嘗彰貞柔自固謹案諡法嚮惠德義曰獻請追尊諡曰孝平獻皇后皇妣南陽郡太夫人何氏族惟華貴德乃寬冲禮諧義聽之文詩協和鳴之詠履大跡而鍾慶祔神龍而克祥固有靈符來弘景祚謹案諡法溫柔聖善曰懿請追尊諡曰孝元懿皇后勅敬典禮

七月壬申帝御崇元殿備禮命使冊四廟于維京以
四代祖朔州府君為孝安皇帝廟號靖祖以高祖妣
秦氏為孝安元皇后以曾祖右省嘗侍府君為孝簡
皇帝廟號肅祖以曾祖妣安定郡太君安氏為孝簡
恭皇后以太王父振武僕射府君為孝平皇帝廟號
睿祖以皇祖妣高平縣太君米氏為孝平獻皇后以
皇考雒州太傅府君為孝元皇帝廟號憲祖皇妣南
陽郡太夫人何氏為孝元懿皇后

三年二月辛丑中書奏禮經云禮不諱嫌名二名不
偏諱注云嫌名謂音相近若禹與雨丘與區也二名

不偏諱謂孔子之母名徵在言在不稱徵言徵不稱
在此古禮也唐太宗二名竝諱玄宗二名亦同人姓
與國諱音聲相近是嫌名者亦改姓氏與古禮有異
廟諱平聲字即不諱餘三聲諱側聲不諱平聲字所
諱字玉文及偏旁闕點畫望依令式施行勅朝廷之
制今古相沿道在人弘禮非天降况以方開曆數虔
奉祖宗雖喻孔子之文未爽周公之訓冀崇孝行永
載簡編取為二名及嫌名事宜依唐禮施行乃付所
司五月丁巳勅應諸州縣名犯廟諱等相南管內資
興縣本州名犯肅祖孝簡皇帝廟諱宜改為敦州州

管縣名與州名同改爲敦化縣義縣上一字亦與本
州名同改爲敦和縣武岡縣本州名與憲祖孝元皇
帝廟諱上一字音同宜改爲敏州州管陽縣上一字
與州名同改爲敏政縣嶺南晉興縣本州名與孝元
皇帝廟諱下一字音同改爲鉞州建州管武縣上一
字亦與憲祖孝皇帝廟諱上一字音同改爲昭武縣
其已前州府縣上中下仍准舊制爲定

五年二月乙巳御史中丞竇貞固奏國忌日宰臣跪
爐焚香僧人表讚孝思述祖先違世之事而文武百
辟儼然列坐竊惟禮非天降酌在人情今古通規君

親至敬對佛像行香之日實帝王不樂之辰豈有聽
烈祖之舊勳悉安所坐聞明君之至德曾不暫興考
經雖謂其相承度禮深疑其有失欲請跪爐仍舊餘
依嘗位立班詔可其言仍令行香之後飯僧百人永
爲定制

少帝以天福七年六月卽位上高祖尊諡曰聖文章
武孝皇帝十月中書奏太常禮院狀申高祖十二月
一十日祔饗于太廟禮畢合定逐年四季郊壇配坐
准禮例逐年勘造祠祭晝日及編附令式伏請奏聞
宣下者靖祖孝安皇帝配冬至祀昊天上帝夏至祭

皇地祇肅祖孝簡皇帝配上辛祀昊天上帝孟冬祭神州地祇睿祖孝平皇帝配孟夏雩祀昊天上帝憲祖孝元皇帝配秋季大饗祀昊天上帝以前天福二年七月勅配座伏緣高祖祔廟請憲祖配孟冬祭神州地祇高祖配季秋大饗祀昊天上帝從之

八年二月以寒食節帝幸南莊遙奠顯陵焚御衣衣著紙錢至暮還宮

開運二年正月宗正卿石光贊上言園陵宗廟請依古義時節薦新從之

漢高祖初卽位追尊太祖高皇帝世祖光武皇帝爲

不祧廟以親廟高祖司徒府君諱上諡曰明元皇帝廟號文祖高祖母隴西郡夫人李氏諡曰明貞皇后曾祖太保府君諱上諡曰恭僖皇帝廟號德祖曾祖母號國太夫人楊氏諡曰恭惠皇后烈祖太傅府君諱上諡曰昭獻皇帝廟號翼祖烈祖母曾國太夫人李氏諡曰昭穆皇后烈考太師府君諱上諡曰章聖皇帝廟號顯祖烈妣吳國太夫人安氏諡曰章懿皇后

乾祐元年正月吏部奏鄧州臨湍縣下一字犯文祖明元皇帝廟諱勅改爲臨瀨縣仍付所司

隱帝以乾祐元年二月即位上高祖尊諡曰睿文聖
武昭肅孝皇帝

十二月奉六廟神主于雒陽命宰臣蘇禹珪使副太
府卿劉皞冊焉

二年兵部員外郎盧瓊上言恭以高祖皇帝驅除戎
虜救解倒懸德被生民功高遠古請依西漢祖宗故
事于三京陝府許宋等州舊邸立別廟塑像以時禮
祀以表遺愛從之

周太祖廣順元年二月癸丑寒食節帝出玄化門至
蒲池設御幄遙拜諸陵用家人之禮也

五月辛未太嘗卿邊蔚上追尊四廟諡議皇高祖諱
瑒請上尊諡曰睿和皇帝廟號信祖陵曰溫陵皇高
祖妣夫人張氏請上尊諡曰睿恭皇后皇曾祖太保
諱謹請上尊諡曰明憲皇帝廟號僖祖陵曰齊陵皇
曾祖妣鄭國夫人申氏請上尊諡曰明孝皇后皇祖
太傅諱蘊請上尊諡曰翼順皇帝廟號義祖陵曰節
陵皇祖妣陳國夫人韓氏請上尊諡曰翼敬皇后聖
考太師諱簡請上尊諡曰章肅皇帝廟號慶祖陵曰
欽陵聖妣燕國夫人王氏請上尊諡曰章德皇后又
內出忌辰信祖四月七日睿恭皇后十月二十七日

僖祖十二月七日明孝皇后正月十二日義祖五月
元日翼敬皇后十一月十四日其三祖忌辰皇帝不
視事宰臣百官赴佛寺行香慶祖九月十四日章德
皇后三月十八日忌辰皇帝不視事一日宰臣百官
西上閣門進名奉慰後赴佛寺行香勅敬依典禮
七月癸酉太廟冊禮使馮道等至西京廟每室讀寶
冊行祔饗之禮從西第一室信祖睿和皇帝睿恭皇
后張氏祔饗第二僖祖明憲皇帝明孝皇后申氏祔
饗第三義祖翼順皇帝翼敬皇后韓氏祔饗第四慶
祖章肅皇帝章德皇后王氏祔饗宰臣百官進名奉

慰幸西帝被袞冕御崇元殿授四廟四室寶冊于使
中書令馮道等是日侍中進冊中書令進寶太祖降
階授之于使悽然感慟

八月庚子賜冊太廟使及行事官綵帛銀器有差
二年三月丁巳寒食節太祖幸城南園申遙奠之敬
用家人之禮也

十二月南郊大禮使中書令馮道自西京奉太廟神
主至群臣班于西御園之東帝郊迎望輿再拜有司
相禮廟主就行廟幄親行奠饗禮畢帝移蹕太廟門
俟神輿至再拜百官陪位皆再拜官聞令奉神主于

四室帝設奠行祔饗禮畢還宮
 三年七月太嘗上言祭禮宗廟之祀三年一禘以孟
 冬五年一禘以孟夏恭惟追尊四廟經今三年准禮
 合改十月孟冬薦享為禘從之是月命兵部侍郎邊
 歸讜朝拜漢睿陵穎陵

世宗顯德元年正月卽位三月上太祖尊諡曰聖神
 恭肅文武孝皇帝

六月親征河東廻至新鄭縣丙寅親拜嵩陵望陵號
 慟至陵俯伏悲泣哀感左右拜跪祭奠而退賜奉陵
 新吏及近郊人戶泉有差

五年四月遷五廟神主入于新廟先是以舊太廟在
 天街之側患其囂塵所及故改創今廟制度宏壯不
 日而成時帝征淮南車駕在行權東京留守王朴率
 陪司百官奉迎神主以安于室

六月禘於太廟

恭帝以顯德六年六月卽位八月上世宗尊諡曰睿
 武孝文皇帝

冊府元龜

冊府元龜

帝王部

卷之三十一

册府元龜

淮南李嗣京參閱

西極文翔鳳訂正

豫章黃國琦較釋

帝王部 三十二

崇祭祀

書曰先王顧諟天之明命以承上下神祇洪範八政
三曰祀禮大宗伯之職曰以吉禮事邦國之鬼神祇
故祭天曰燔柴祭地曰瘞埋祭山曰取縣祭川曰浮
沉祭星曰布祭風曰磔是類是禡師祭也既伯既禱

馬祭也除惡之祭為祓會福之祭曰禴告事求福曰
禱道上之祭為祖潔意以享為禋以類祭神為禴祭
司命為祫祭豕先為禮月祭為粹禱雨為雩禱明為
祭是以聖王為之典禮民之精爽不貳齊肅聰明者
神或降之乃有神明之官各司其序不相亂也民神
異業恭而不黷所以神降之嘉生民以物序災禍不
至所求不匱歷代人君罔不徧走群望咸秩無文故
神農播種始諸飲食致恭鬼神顙頊亦潔誠以祭祀
其後成湯至于帝乙罔不明德恤祀所以陰陽和而
萬物遂也詩云以享以祀以介景福又云俾爾彌爾

性百神爾主矣故祭之言察也察者至也言人事至
于鬼神也是知神不可慢祭不可黷蓋享於至誠者
耳豈犧牲玉帛云乎哉

共工氏霸九州其子曰句龍能平水土死為社祠

烈山氏王天下其子曰柱能殖百穀死為稷祠伊耆

氏始為蜡

伊耆氏古天子號

舜在璿璣玉衡以齊七政肆類於上帝禋於六宗望

於山川徧於群神

史記徧作辨

湯伐桀欲禘夏社不可作夏社

應劭曰遭犬旱七年明德以薦而旱不止

故遷社以棄代為稷欲遷句龍德莫能繼故作夏社說不可遷之義禘古遷字 廼遷烈山子

柱而以周棄代為稷祠周文王巡守而祀四嶽河海作般之詩

成王立周公相王道大洽制禮作樂天子曰明堂辟雍諸侯曰泮宮郊祀后稷以配天宗祀文王於明堂以配上帝四海之內各以其職來助祭天下名山大川懷柔百神咸秩無文五嶽視三公四瀆視諸侯而諸侯祭其疆內名山大川大夫祭門戶井竈中霤五祀士庶人祖考而已各有典禮而淫祭有禁是時巡守告祭柴望作時邁之詩春夏祈穀于上帝作噫嘻之詩郊祭祀天地作昊天有成命之詩

漢高祖初起禱豐粉榆社狗沛為沛公則祀蚩尤

漢書本紀載高祖立為沛公祠黃帝祭蚩尤于沛庭而擊鼓遂以十月至霸

上立為漢王

二年東擊項籍而還入關問故秦時上帝祀何帝也對曰四帝有白青黃赤帝之祠高祖曰吾聞天有五帝而四何也莫知其說於是高祖曰吾知之矣迺待我而具五也迺立黑帝祠名曰北畤有司進祠上不親往悉召故秦祀官復置太祝大宰如其故儀禮因令縣為公社公社官社下詔曰吾甚重祀而敬祭今上帝之祭及山川諸神當祠者各以其禮時祠如故後四歲天

下已定詔御史令豐治粉榆社嘗以春時以羊彘祀之時令祝立蚩尤之祠於長安置祠祀官女巫其梁巫祠天地天社天水房中堂上之屬晉巫祠五帝東君雲中君巫社巫祠族人炊之屬秦巫祠社王巫保族纍之屬荆巫祠堂下巫先司命施糜之屬九天巫祠九天皆以歲時祠宮中其河巫祠河于臨晉而南山巫祠南山秦中者二世皇帝也各有時日其後二歲或言曰周興而邑立后稷之祠至今血食天下又制詔御史其天下立靈星祠嘗以歲時祠以牛

十年春有司請令縣嘗以春二月及臘祠稷以羊彘

民里社各自裁以祠制曰可高帝以來名山大川在諸侯諸侯視各自奉祠

天子官不領及文帝時齊淮南國廢令太祀盡以歲時致禮如故

文帝十三年以歲比登詔有司增雍五時路車各一

乘駕被具駕車被馬之文節皆具也西時畦時寓車各一乘寓馬

四匹駕被具河湫漢水王加二及諸祀皆廣壇場珪幣俎豆以差加之

十四年詔曰朕獲執犧牲珪幣以事上帝宗廟十四

年于今歷日彌長以不敏不明而又撫臨天下朕甚

自媿其廣增諸祀壇場珪幣昔先王遠施不求其報

望祀不祈其福右賢左戚先民後已至明之極也今

吾聞祀官祝釐音倍福也皆歸福于朕躬不為百姓朕甚

媿之夫以朕之不德而專鄉獨美其福百姓不與音預

焉是重直用切吾不德也其令祠官致敬無有所祈

十五年黃龍見成紀詔曰有異物之神見于成紀毋

害于民歲以有年朕幾幾讀曰冀郊祀上帝諸神禮官議毋諱以朕勞無諱以成其勞自言不以爲勞也有司皆曰古者天子

夏親郊祀上帝於郊故曰郊於是夏四月文帝始幸

雍郊見五時祠衣皆上赤赦天下修名山大川嘗祀

而絕者有司以歲時置禮先是趙人新垣平以望氣見上言長安東北有神氣

成五采若人冠冕焉或曰東北神明之舍西方神明之墓也天瑞下宜立祠上帝以合符應於是作渭陽

五帝廟同于帝一殿面五門各如其帝色祠所用及儀亦如雍五時明年夏四月文帝親拜霸渭之會以

郊見渭陽五帝廟臨渭其北穿蒲池溝水燿火舉祠若光輝然屬天焉於是貴平至上大夫賜累千金而

使博士諸生刺六經中作王制謀議巡狩封禪事文帝出長門若見五人道北遂因其直立五帝壇祠以

五

孝景帝卽位十六年宮祠各以歲時如故

武帝建元元年五月詔曰河海潤千里其令祠官修

山川之祠爲歲事曲加禮

元光二年十月行幸雍祠五時郊祀志云後嘗三歲一郊見

元狩元年十月行幸雍祠五時獲白麟

二年十月行幸雍祠五時

元鼎四年十月行幸雍祠五時

十一月甲子立后土祠于汾陰睢上

五年十月行幸雍祠五時

十一月辛巳朔旦冬至立泰時于甘泉天子親郊見

朝日夕月詔曰朕以眇身託于王侯之上德未能綏
 民民或饑寒故巡祭后土以祈豐年冀州雕壤廼顯
 文鼎獲薦於廟渥注水出馬朕其御焉戰戰兢兢懼
 不克任思昭天地內惟自新詩云四牡翼翼呂征不
 服親省邊陲用事所極望見泰一修天文禮禮古禪字辛
 卯夜若景光十有二明易曰先甲三日後甲三日朕
 甚念年歲未成登飭躬齊戒丁酉拜貺于郊既賜也
 元封元年正月詔曰朕用事華山至于中嶽獲駿廐
 見夏后啓母石啓生而母化為石在嵩高山下翼日親登嵩高御史
 乘屬在廟天子出御史除二人為乘曹護車駕吏卒咸聞呼萬歲者三

祭禮罔不答其令祠禁無伐其草木呂山下戶三百
 為之奉邑名曰崇高獨給祠復亡所與

二年十月行幸雍祠五時春幸緱氏遂至東萊夏四
 月還祠泰山四月行幸雍祠五時幸河東

三月祠后土詔曰朕躬祭后土地祇見光集于靈壇
 一夜三燭幸中都宮殿上見光其赦汾陰夏陽中都

死罪呂下賜三縣及楊氏皆無出今年租賦
 五年冬南巡狩至于盛唐遂北至琅邪並海所過禮

祠其名山大川增封泰山還幸甘泉郊秦時
 六年三月行幸河東祠后土

天漢元年正月行幸甘泉郊泰畤

三月行幸河東祠后土

太始三年三月幸琅邪禮曰成山登之罘浮大海山

呼萬歲

四年三月行幸太山祠明堂

四月幸不其

不其山名

祠神人於交門宮若有鄉坐拜者

漢注云神並見且白且黑且大且小

作交門之歌

後元元年正月幸甘泉郊泰畤

帝即位凡敬鬼神之祠漢興已六十餘歲

矣天下又安縉紳之屬皆望天子封禪改正度也而上鄉儒術招賢良趙絳王臧等以文學為公卿欲議古立明堂城南以朝諸侯草巡狩封禪改歷服色事未就竇太后不好儒術使人徵伺趙絳等姦利事案

維賦自殺諸所興為皆廢六年竇太后終其明年徵文學之士明年上初至雍郊見五畤後嘗三歲一郊

見壯人謬忌奏祠泰一方曰天神貴者泰一泰一佐曰五帝古者天子以春秋祭泰一東南郊曰一太牢

七日為壇開八通之鬼道於是天子令大祝立其祠長安城東南郊嘗奉祀如忌方其後人上書言古者

天子三年一用太牢祠三一天一地一泰一天子許之令太祝領祠之於忌泰一壇上如其方後人復有

言古天子嘗以春解祠祠黃帝用一臯破鏡冥羊用羊祠馬行用一青牡馬泰一臯山山君用牛武夷君

用乾魚陰陽使者以一牛令祠官領之如其方而祠泰一於忌泰一壇房元符二年天子郊雍詔曰今上

帝朕親郊而后土無祀則禮不合答也有司與太史令談祠官寬舒議天地牛角繭栗今陛下親祠后土

后土宜於澤中園丘為五壇壇一黃犢牢具已祠盡瘞而從祠衣上黃於是天子東幸汾陰汾陰男子公

孫滂洋等見汾旁有光如絳上遂立后土祠於汾陰

雕上如寬舒等議上親望拜如上帝禮後郊雍至隴西登崆峒幸甘泉令祠官寬舒等具泰一祠壇于亳

南除八通鬼道泰一所用如雍一時物而加醴棗脯之屬殺一牡犛牛以為俎豆牢具而五帝獨有俎豆進其下四方地為膾食羣神從者及北斗云已祠胙餘皆燎之其牛色白白鹿居其中晁在鹿中水而酒之祭日以牛祭月以羊彘特泰一祝宰則衣紫及繡五帝各如其色日夕赤月白十一月辛巳朔旦冬至助爽天子始郊郊泰一朝朝日夕月則揖而見泰一如雍郊禮其贊饗曰天始以寶鼎神策授皇帝朔而

又朔終而復始皇帝敬拜見焉而衣上黃其祠烈火滿壇壇旁享炊具有司云祠上有光公卿言皇帝始郊見泰一雲陽有司奉瑄玉加牲薦饗是夜有美光及晝黃氣上屬天太史令談祠官寬舒等曰神靈之休祐福兆祥宜因此地光域立泰畤以明應令太祝領秋及臘間祠三歲天子一郊見太初一年有司言雍五時無牢熟具芬芳不備乃令祠官進時犢牢具已食所勝而以木寓馬代駒云及諸名山山川用駒者悉以木寓馬代獨行過親祠廼用駒它禮如故武帝諸所興如亳忌泰一及冥羊馬行赤星五狀寬舒之祠官以歲時致禮凡六祠皆太祝領之至如八神人謬忌凡它山各祠行過則祠去則犛牛土所興祠

各自王其人終終則已祠官不王它祠皆如故甘泉泰一汾陰后土三年親郊祠而泰山五年一修封武帝凡五

宣帝神爵元年正月行幸甘泉郊泰時

三月行幸河東祠后土

帝即位霍光輔政上其已正南面非宗廟之祀不出至十

二年乃下詔曰蓋聞天子尊事天地修祀山川古今通禮也聞者上帝之祠闕而不親十有餘年朕甚懼焉然朕親飭躬齊戒親奉祀為百姓蒙嘉氣獲豐年焉明年正月上始幸甘泉郊見泰時數有靈祥修武帝故事盛車服敬齊祀之禮頗作詩歌後制詔太嘗夫江海百川之大者也今闕焉無祀其令祠官以禮為歲事以四時祠江海雒水祈為天下豐年焉自是五嶽四瀆皆有嘗禮祀東嶽泰山於博中嶽秦室于嵩高南嶽瀟山於瀟西嶽華山於華陰北嶽常山於上曲陽河於臨晉江於江都淮於平氏濟於臨邑界中皆使者持節侍祠唯泰山與河歲五祠江水四餘皆一禱而三祠云時南郡獲白虎獻其皮牙爪上為

立祠又以方士言為隨侯劔寶玉璧周康寶鼎立四
祠於未央宮中又祠太室山於鄆墨三尸山於下密
祠天封苑火井於鴻門又立歲星辰星大白熒惑南
斗祠於長安旁又祠三山八神於曲城蓬萊山石社
鼓於臨胸之界山於腫成山於不夜萊山於黃城山
祠曰萊山祠又祠四時於琅邪蚩尤于壽良京師近
縣郭則旁谷五牀山日月五帝仙人玉女祠雲陽有
徑路神祠祭休屠王也又立五龍山仙人祠黃帝天
神帝原水凡
四祠於膚施

五鳳元年正月行幸甘泉郊泰時

昭帝即位富於春
秋未嘗巡祭至此

始復

二年三月行幸雍祠五時

三年三月行幸河東祠后土

甘露元年正月行幸甘泉郊泰時

三年正月行幸甘泉郊泰時

黃龍元年正月行幸甘泉郊泰時

孝元初元二年正月行幸甘泉郊泰時

四年正月行幸甘泉郊泰時

三月行幸河東祠后土

永光元年正月行幸甘泉郊泰時

帝即位遵舊儀間
歲正月一幸甘泉

郊泰時又東至河南祠后土西至雍祠五時凡五奉
泰時后土之祠亦施恩澤時所過毋出田租賜百戶
牛酒或賜爵赦罪人

成帝建始元年十二月作長安南北郊罷甘泉汾陰

二年正月罷雍五時辛巳上始郊祀長安南郊詔曰

廼者徙泰時后土于南郊北郊朕親飭躬郊祀上帝
皇天報應神光竝見三輔長無共張繇役之勞共音居庸

切張音竹亮切 救奉郊縣長安長陵天郊在長安南地郊在長安城北長陵界中二

縣有奉郊之勤 及中都官耐罪中都官京師諸官府 減天下賦

錢筭四十

三月辛丑始祀后土於北郊

永始二年十一月行幸雍祠五時

三年三月行幸雍祠五時十一月皇太后詔有司復甘泉泰時汾陽后土雍五

時陳倉陳寶祠

四年正月行幸甘泉祠泰時

三月幸河東祠后土

元延二年正月行幸甘泉郊泰時

四年正月行幸甘泉郊泰時

三月行幸河東祠后土

綏和元年三月行幸雍祠五時

二年三月行幸河東祠后土帝即位丞相衡御史大夫譚等奏甘泉泰時河

東后土祠可徙置長安及議罷不應禮神祠事具掌禮部奏議門明年衡譚坐事免官爵衆庶多言不當變動祭祀者又初罷甘泉泰時作南郊日大風壞甘泉竹宮折拔時中樹木十圍以上百餘天子異之以問劉向對曰家人尚不欲絕種祠况於國之神寶舊時且甘泉汾陰及雍五時始立皆有神祇感應然後營之非苟而已也武宣之世奉此三神禮敬救備神光尤著祖宗神祇舊位誠未易動及陳寶祠自秦文

公至今七百餘歲矣漢興世世嘗來光色赤黃長四五丈直祠而息音聲碎隱野雞皆雖每見雍太祝寺以大牢遣侯者乘傳馳詣行在所以為福祥高祖時五來文帝二十六來武帝七十五來宣帝二十五來初元元年以來亦二十來此陽氣舊祠也及漢宗廟之禮不得擅議皆祖宗之君與賢臣所共定古今異制經無明文至尊至重難以議說正也前始納貢禹之議後人相因多不動搖易大傳曰誣神者殃及三世恐其咎不獨止禹等上意恨之後上以無繼嗣故令皇太后詔有司曰蓋聞王者承事天地交接泰一尊莫著於祭祀孝武皇帝大聖通明始建上下之祀營泰畤於甘泉定后土於汾陰而神祇安之饗國長久子孫蕃滋累世遵業福流於今今皇帝寬仁順孝奉循聖緒靡有大愆而久無繼嗣思其舊職殆在徙南北郊違先祖之制改神祇舊位失天地之心以防繼嗣之福春秋六十未見皇孫食不甘味寢不安席朕甚悼焉春秋大復古善順祀其復甘泉泰畤汾陰后土如故及雍五畤陳寶祠在陳倉者天子復親郊祀如前又復長安雍及郡國祠著明者且半後成都侯王商為大司馬衛將軍輔政杜鄴說商曰東隣殺

牛不如西隣之禴祭言祭天之道貴以誠質大得民心也行穰祀豐猶不蒙祐德修薦薄吉必大來古者壇場有嘗處燎禋有嘗用贊見有嘗禮犧牲玉帛雖備而財不匱車輿匠役雖動而用不勞是故每舉其禮助者歡說大路所歷黎元不知今甘泉河東天地郊祀咸失方位違陰陽之宜及雍五祀皆曠遠奉遵之役休而復起繕治供張無解已時皇天若像殆可畧知前上甘泉先驅失道禮月之夕奉引復迷祠后土還臨河當渡疾風起波船不可御又雍大雨壞平陽宮垣邇三月甲子雷電災琳光宮門祥瑞未著咎徵仍臻近三郡所奏皆有變故不答不饗何以堪此詩曰率繇舊章先王法度文王以之郊神于祀子孫千億宜如異時公卿之議復還長安南北郊後皇太后詔復之

哀帝卽位寢疾盡復前世所嘗興諸神祠官凡七百

餘所一歲三萬七千祠

平帝元始四年正月郊祀高祖以配天宗祀孝文以

配上帝 時王莽奏請議正五帝兆并立官稷事具帝王禮部奏議門

後漢光武建武元年六月己未即位于鄗為壇營於鄗之陽祭告天地采用元始中郊祭故事八月壬子祭社稷

二年正月壬子立大社大稷于雒陽在宗廟之右方壇無屋有墻門而已二月八日及臘一歲三祠皆太牢具使有司祠又立郊兆于城南七里

中元二年正月辛未初立北郊祠后土

明帝永平二年正月辛未初祀五帝於明堂光武帝配

終

册府元龜

巡按福建監察御史臣李嗣京 訂正

知長樂縣事 臣夏允彝參閱

知建陽縣事 臣黃國琦較釋

帝王部 三十二

崇祭祀

章帝元和二年二月甲寅詔曰今山川百神應典禮者尚未咸秩其議增修群祀以祈豐年是月冬巡狩辛未柴祭天地群神如故事壬申宗祀五帝於孝武所作汶上明堂以光武帝配如雒陽明堂祀

四月還京都為靈臺十二門作詩各以其月祀而祭

之

三年二月戊辰幸中出遣使者祀北嶽出長城

史記蒙恬

為秦築長城西自臨洮東至海

二月乙卯進幸趙庚辰禱房山於靈壽

靈壽縣名屬嘗山郡房山

今在鎮州房山縣西北俗名王母山上有王母祠

安帝元初六年三月庚辰始立六宗祀於雒城

時尚書歐

陽說謂六宗者在天地四方之中為上下四方之宗禮比太社也

延光三年二月辛卯幸太山柴告岱宗

太山王者告代之處為五

嶽之宗故曰岱宗燔柴以告天

壬辰宗祀五帝于汶上明堂

靈帝熹平五年四月復崇高名為嵩高

前書武帝祠中嶽改嵩高

為崇高東觀漢紀曰使中郎將堂谿典請兩因上言改之名為嵩高山

獻帝建安元年七月甲子至雒陽丁丑郊祀上帝

八年十月己巳公卿初迎冬於北郊

斯祭久廢故曰初 總章

始復備八佾

袁宏記云迎氣北郊始用八佾舞列也舞者之行列往因亂廢今始備之總章

樂官各古之安代樂

魏文帝黃初元年十一月庚午即阼於繁陽燎祭天

地五嶽四瀆

二年正月郊祭天地明堂甲戌較獵於元陵乙亥朝

日子東郊是年六月庚子初祀五嶽四瀆咸秩群祀
瘞沉珪璧

四年七月乙未大軍當出使太嘗以特牛一告祠于
郊

六年八月帝以舟師入淮九月遣使者沉璧于淮

明帝太和元年正月郊祀武帝以配天宗祀文皇於
明堂以配上帝

二月丁亥朝日于東郊

八月己丑夕月于西郊

四年八月辛巳行東巡遣使者以特牛祠中嶽

魏書曰行

過繁昌使執金吾臧霸行
太尉事以特牛祀受禪壇

景初元年十月乙卯始營雒陽南委粟山為園丘詔
曰昔漢氏之初承秦滅學之後採撫殘缺以備郊祀
自甘泉后土雍宮五時神祇兆位多不經見竝以興
廢無嘗一彼一此四百餘年廢無禘禮古代之所更
立者遂有闕焉曹氏世系出自有虞氏今祀園丘以
始祖帝舜配號園丘曰皇皇帝天方丘所祭曰皇皇
后地以舜配伊氏配天郊所祭曰皇天之神以太祖
武皇帝配地郊所祭曰皇地之祇以宣武皇后配宗
祀皇考高祖文皇帝於明堂以配上帝

十二月壬子冬至始祀皇皇帝于圓丘以始祖有虞帝舜配自正始以後終魏世不復郊祀

陳留王咸熙元年正月幸長安使者以璧幣祀華山晉武帝泰始二年正月詔曰有司前奏郊祀權用魏禮朕不慮改作之難令便爲永制衆議紛紜遂不時定不得以時供饗神祇配以祖考日夕難企旣食安其便郊祀時群臣又議五帝卽天地王氣時異故殊其號雖名有五其實一神明堂南郊當除五帝之坐五郊改五精之號皆同稱昊天上帝各設一座而已地郊又除先後配祀帝悉從之

二月丁丑郊祀宣皇帝以配天宗祀文皇帝於明堂以配上帝禮文不元且其時亦曰文皇帝於明堂十一月有司議奏古者丘郊不異宜并圓丘方丘於南北郊更修立壇兆其二至之祀合於二郊帝又從之一如宣帝所用王肅議也是月庚寅冬至帝親祀圓丘於南郊自是後圓丘方澤不別立

太康二年正月有司奏春分依舊請車駕祀朝日寒溫未適可不親出詔曰禮儀宜有常若如所奏與故太尉所撰不同復爲無定制也間者方難未平故每從所奏今戎事弭息惟此爲大按詔帝復爲親祀也

三年正月帝親郊祀皇太子悉侍祠

九年三月壬辰初并二社為一

前漢但置官社而無官稷莽置官稷後復

故漢至魏但太社有稷而官社無稷故嘗二社一稷也晉初仍魏無所增損至太康九年建宗廟而社祀壇與廟俱徙乃詔曰社實一神其無二社之祀

十年六月庚子復置二社

十月詔曰孝經郊祀后稷以配天宗祀文王於明堂以配上帝而周官云祀天旅上帝又曰祀地旅四望望非地則明上帝不得為天也往者衆議除明堂五帝位考之禮文不正且詩序曰文武之功起于后稷故推以配天焉宣帝以神武創業既已配天復以先

帝配天於義亦所不安其復明堂及南郊五帝位

惠帝元康六年祿壇石中破為二詔更鑄石令如舊

置高禘壇上埋破石入地一丈

元帝大興二年春始議立郊祀儀

尚書令刁協國子祭酒杜夷議宜須

旋都雒邑乃脩之司徒荀組據漢獻帝都許郡便立郊自宜於此脩奉駟騎王導僕射荀崧山太嘗華堂中書侍郎庾亮皆同組議事遂施行立南郊於巳地其制度皆太嘗賀循所定多依漢及晉初之儀三月辛卯帝親郊饗配之禮一依武帝始郊故事是時尚未立北壇地祇衆神共在天郊

明帝大寧三年七月詔曰郊祀天地帝王之重事自

中興以來惟南郊未曾北郊四時五郊之禮都不復

祀五嶽四瀆各山大川載在祀典應望秩者悉廢而

未舉王者其依舊詳處

成帝咸和八年正月追述明帝前旨於覆州山南立

北郊 天郊則五帝之佐日月五星二十八宿文昌北

斗三台司命軒轅后土天一太一太微鈞陳北

極兩師雷電司空風伯老人凡六十二神也地郊則

五嶽四望四瀆五湖五帝之佐沂山嶽山白山霍山

醫無閭山蔣山松江會稽山錢塘江先農凡四十四

神也江南諸小山蓋江左所立猶如漢西京關中小

水皆有祭秩也是日辛未祀地郊始以宣

穆張皇后配地魏氏配地事皆非晉舊也

康帝建元元年正月辛未南郊辛巳北郊帝皆親奉

後魏道武登國元年即代王位于牛川西向設祭告

天禮成

天興元年七月遷都平城始立社稷并立壇兆告祭

天地

二年正月甲子初祠上帝於南郊以始祖神元皇帝

配 為壇通四陛為壇將三重天位在其南面神元西

面五精帝在壇內壇內四帝各于其方一帝在

木日月五星二十八宿天一太一北極司中司命司

祿司民在中壇內各因其方其餘從食者各一干餘

神駘在外壇內藉用藁秸玉用四珪幣用束帛牲用

黝犢器用陶匏上帝神元用犢各一五方帝共用犢

一日月等共用牛一祭畢燎牲體在于壇南已地從

陽之義其瘞地壇兆制同南郊明年正月辛酉郊天

癸亥瘞地於北郊以神元實皇后配五嶽名山在中

壇內四瀆大川于外壇內后土神元后牲共用玄牡

一玉兩珪幣用束帛五嶽等用牛一祭畢瘞牲體在

于壇之北亥地從陰也其後冬至祭上帝于圜丘夏

至祭地于方澤用牲幣之屬與二郊同冬十月置大

社大稷帝社于宗廟之右為方壇四陛祀以二月八

一宮中立星神一歲一祭嘗以十二月用馬鹿各一
牛豕各二雞一太祖初有兩彗星見劉后使占者占
之曰祈之則當掃定天下后從之故立其祀又立神
位二歲一祭嘗以十月令用牛一雞二又立王神四
歲二祭嘗以八月十月各用羊一又晉獻明以上所
立天神四十所歲一祭亦以八月十月神尊者以馬
次以牛小以羊
皆女巫行事

三年正月癸亥有事於北郊

二月丁亥詔有司祀日于東郊用騂牛秋分祭月于

西郊用白羊一

天賜二年四月復祀天子西郊

為方壇一置木王七于上東為二陛無等

周垣四門門各依其方色名為牲白犢黃駒白羊各
一祭之日帝御大駕百官及賓國諸侯大夫畢從至
郊所帝立青門內近南壇西內朝臣皆位于帝壇北
外朝臣及大夫咸位于青門之外后率六宮從黑

入列于青門內近西北西廩犧令掌牲陳于壇前女
巫執鼓立于陛之東西西面選帝之十族子弟七人執
酒在巫南西面北上女巫升壇搖鼓帝拜后肅拜百
官內外盡拜祝訖復拜拜訖乃殺牲七執酒七人西
向以酒灑天神士復拜如此者
禮畢而返自是之後歲一祭

明元承興三年三月帝禱于武周車輪二山

初清河王紹有

龍于道武性凶悍帝每以義責之弗從帝懼其變乃
於山上祈福於天地神祇及卽位壇兆後因以為常
祀歲一祭牲用牛皆帝親祀之無嘗月明年立道武
廟于白登山歲一祭其牲太牢帝親祀之亦無嘗月
兼祀皇天上帝以山神配旱則禱之多有效是歲又
加置天地日月之神及諸小神二十八所於宮內歲
二祭各用羊一又別置天神等二十三於
道武廟左右其神大者以馬小者以羊

泰嘗三年為五精帝兆於四郊遠近依行數各為方

壇四陛埽壇三重通四門以太驛等及諸佐隨配侑

祭黃帝嘗以立秋前十八日餘四帝各以四立之日
 牲各用牛一有司主之又六宗靈星風伯雨師司民
 司祿先農之壇皆有別兆祭有嘗日牲用少牢立春
 之日遣有司迎春于東郊祭用酒脯棗栗無牲幣又
 立五嶽四瀆廟于桑乾水陰春秋遣有司祭有特牲
 及幣四瀆唯以牲牢准古望秩云其餘山川及海若
 諸神在州郡者合三百二十四所每歲十月遣祀官
 詣州鎮遍祀有水旱災厲則牧守各隨其界內而祈
 謁其祭皆用牲王畿內諸山川皆列祀次祭若有水
 旱則禱之

四年八月辛未幸代至鴈門關望祀嘗嶽

八年正月南巡恒嶽祀以太牢

四月幸雒陽遣使以太牢祀嵩高華嶽還登太行

五月至自雒陽諸所過山川群神祀之

太武神麇二年四月以小駕祭天神禮畢帝遂親戎

大捷而還歸格於祖禰通告群神

大延元年立廟于恒嶽華嶽嵩嶽上各置侍祀九十

人歲時祈禱其水旱春秋泮涸遣官率刺史祭以牲

牢有玉幣

魏之先居幽都也鑿石為祖宗之廟於烏
 維侯國西北自後南遷其地隔遠真君中

烏維侯國遣使朝獻云石廟如故民嘗祈請有神驗
 焉其歲常中書侍郎李暉詣石堂告祭天地以皇祖

先妣配祀日天子諱謹遣厥等用駿足一元大武敢
昭告于皇天之靈自啓闢之初祐我皇祖于被田土
歷載億年幸來南遷惟祖惟父光宅中原克剪凶醜
極定四邊冲人慕業德聲弗彰豈謂幽遐稽首來王
具知舊廟弗毀弗亡攸攸之懷希仰餘光王業之興
起自皇祖絲絲瓜瓞時惟多祐敢以丕功配享於天
子子孫孫福祿永延厥等既祭斬樛木立之以宣牲
禮而還後所立禪木長成林其民益神奉之咸謂魏
國感靈祇之應也石室南距岱宗可四千餘里明年
六月司徒崔浩奏議所祀多不經案祀典所宜祀凡
五十七所餘復重及
水神請皆罷之奏可

十二月遣使者以太牢祀北嶽

太平真君十二年十一月帝南征過嘗山祀以太牢

浮河濟祀以少牢過岱宗祀以太牢遂臨登瓜步而

還

文成興光元年正月遣有司詣華嶽修廟立碑數十
人在山上聞虛中若音聲聲中稱萬歲云和平元年
正月帝東巡幸遼西望祀醫無閭山遂緣西南幸冀
州北至中山過嘗嶽禮其神而返

二年二月帝南巡過石門遣使者用玉璧牲牢禮嘗

嶽

四月旱下詔郡州於其界內神無大小悉灑掃薦以
酒脯年登之後各隨本秩祭以牲牢至是群祀先廢
者皆復之

獻文皇興二年二月以青徐既平遣中書令兼太嘗

高允奉玉幣祀於東嶽

孝文太和十年四月甲子帝初以法服御輦祀於西郊

十二年閏九月甲子帝觀築圓丘於南郊

十三年正月辛亥有事於圓丘於是初備大駕五月庚戌有事於方澤

十五年八月議肆類上帝禋於六宗之禮帝親臨決十二月壬辰遷社於內城之西巳酉帝迎春于東郊

十六年二月甲午初朝日于東郊遂爲嘗

三月乙亥帝初迎氣南郊自此爲嘗

八月庚寅帝初夕月於西郊遂以爲嘗

十八年二月乙丑行幸河陰規建方澤之所

十九年正月巳亥南征濟淮命太嘗致祭巳未行幸遐丘遣使以太牢祀岱嶽

十一月行幸委粟山議定圓丘甲申有事于圓丘

二十年五月丙戌立方澤於河陰丁亥有事于方澤宣武景明二年十一月壬寅改築圓丘於伊水之陽乙卯仍有事焉

孝明正光三年十一月乙巳有事於圓丘

五年正月辛丑有事於南郊

出帝太昌元年十一月丁酉日南至有事於圓丘
西魏文帝大統二年正月辛亥祀南郊改以神元皇
帝配

四年正月辛酉拜天於清暉室終帝世遂爲嘗

